

太原府志卷三十四

人物一

自古人物之盛莫著于太原左國載之詳矣兩漢以下
更不絕書豈天之獨鍾于是歟抑地脈之靈使然也夫
山川清淑之氣今古不殊况

國家教化涵濡人材蔚起文有棫樸之休武有干城之選
如胡勤毅之功業孫文定之侃直牛毅節馬莊節之忠
勇與前史所紀輝映後先斯固載筆者所稱道不置也
爰綜核其事如左若夫彬彬蔚蔚有以文學名于時者
例得附書志人物

高陽

臺駘金天氏之裔孫也父昧爲元冥師臺駘能業其官宣

汾洮障大澤以處太原帝顓頊嘉之封諸汾川設爲汾神沈妣蓐黃皆其後也

陶唐

實沈高辛氏之季子也及兄閼伯居於曠林而不相能日尋干戈帝堯弗善也遷閼伯於商邱遷實沈於大夏

注大夏今晉陽縣

實沈主參沒爲參神

夏

唐人陶唐氏之後也其爵上公初堯封唐侯處太原其在帝位遷都平陽以其地處實沈實沈無後唐人因其舊綿夏歷商世保大夏之地周成王滅唐遷之於杜降爵爲伯宣王滅杜伯其子隰叔奔晉爲范氏至漢而有天下

商

唐叔虞唐人之季世也箕君曰叔虞

左氏傳曰唐人服事夏商其季世曰唐叔

虞孔穎達曰服虔以為即武王之子非也傳說唐人即

云季世明季世乃唐人之未世叔虞乃唐人之未君矣

武王之子叔虞則晉之始祖豈得以後世始封之君謂

之前代之末世也帝命武王之子曰虞者天將以唐國

與之即取唐君

之名以為名耳

箕子名胥餘紂之諸父也為殷太師

太谷縣東三十五里有箕城箕子故封也

紂為淫泆箕子諫不聽或曰可以去矣箕子曰為人臣

諫不聽而去是彰君之惡而自說於民吾不忍為也乃

被髮佯狂而為奴遂隱而鼓琴以自悲故傳之曰箕子

操周武王克殷訪問箕子以天道箕子以洪範陳之而

弗臣也乃封箕子於朝鮮制禮定樂為百世祖年蓋百

有餘歲

周

唐叔虞姓姬氏字子干周武王子而成王母弟當邑姜方震太叔夢帝謂已余命而子曰虞將與之唐屬諸參而蕃育其子孫及生有文在其手曰虞遂以命之及成王時唐有亂周公滅唐王與叔虞戲削桐葉爲珪曰以封汝史佚因請擇日立叔虞王曰戲耳史佚曰天子無戲言言則史書之遂封叔虞於唐分以大路密須之鼓闕鞏之甲姑洗之鐘懷性九宗職官五正命以唐誥而封於夏虛啟以夏政疆以戎索遂處參虛是爲唐叔唐叔才武射兕於徒林殪以爲大甲至子燮改國號曰晉是爲晉侯晉侯子寧族是爲武侯武侯之子成侯服人南

徙曲沃徙國以後俱不書

通志載孝伯寒侯孝伯封翟城翟之疆遠矣而未必
太原也寒侯與孝伯同為武穆乃晉地五氏之一不
得專繫於太原又載狐突狐偃其意以為突偃翟產
也今皆不載

趙衰字子餘夙之季弟也

國語杜預注世族譜皆以衰為夙弟史記以為夙生共孟共孟

生衰疑共孟乃夙之別稱共諡而孟其序猶如衰之歿也稱成季而盾之稱宣孟也賢而有文事

晉公子重耳公子師之獻公二十二年衰從重耳奔翟

取翟女叔隗生盾及文公返國入定襄王王與之原

原即

平縣屬太原郡公遂以衰為原大夫曰嘗以壺飧從徑餒而弗

食也遂處原謂之原季公使原季為卿讓於狐偃偃讓

於狐毛而佐之狐毛卒公使趙衰代之辭曰城濮之役

先且居之佐軍也善軍伐有賞善君有賞能其官有賞

兼是三賞不可廢也乃使先且居將上軍公曰趙衰三讓其所讓皆社稷之衛也廢讓是廢德也以衰之故八年蒐於清源作五軍使將新上軍衰始爲卿狐偃卒衰佐上軍襄公六年卒諡曰成子衰之返晉也叔隗留翟文公妻衰以女生同括嬰趙姬固請迎叔隗以盾爲才使爲嫡子七年盾將中軍始爲國政盾以原讓趙同故稱原同亦曰原叔及晉殺趙同以原與祁奚趙武立原復爲趙

陽處父趙衰之屬而公子謹之傅也襄公卽位處父爲太

傅食采於陽邑

陽邑以處父得名今之太谷縣

元年冬處父帥師侵蔡

七年春晉蒐於夷使狐射姑將中軍趙盾佐之處父聘衛而還改蒐於董謂趙盾能易中軍曰使能國之利也

八月襄公卒狐射姑欲立公子樂趙盾不可射姑怨處
父之易其班也九月使續鞫居穀處父陽子剛而上人
以及於難

荀林父中行氏居中都

林父將中行故以爲氏其都謂城之中都今榆次是也詳見世表

濮之戰林父御戎襄公之卒也趙盾使先蔑迎公子雍
於秦林父止之曰夫人太子猶在而外求君此必不行
子以疾辭若何不然將及吾嘗同寮敢不盡心乎弗聽
及先蔑奔秦林父盡送其帑及其器用財賄曰爲同寮
故也靈公六年林父佐中軍成公三年楚伐鄭林父帥
師救鄭伐陳景公三年林父始將中軍救鄭及河聞鄭
旣及楚平林父欲還其佐先穀違命及楚子戰於郟師
敗林父請死公將許之士貞子諫曰林父之事君也進

思盡忠退思補過社稷之衛也若之何殺之公使復其
位八年林父敗赤翟於曲梁遂滅潞初成公四年赤翟
伐晉圍懷及邢邱晉侯欲伐之林父曰使疾其民以盈
其貫將可殪也果滅赤翟公賞林父翟臣千室亦賞士
貞子以瓜衍之縣曰吾獲翟土子之功也微子吾喪伯
氏矣卒諡曰桓子子庚佐中軍是爲中行宣子庚生偃
實弒厲公繼知罃爲政是爲中行獻子偃生吳別有桓
子之弟荀首別族爲知氏號曰知季佐中軍諡曰莊子
首生罃悼公時爲政始稱知伯諡曰武子罃生朔早卒
朔生盈爲下軍佐諡曰悼子盈生躒定公時爲政是爲
知伯文子躒生甲諡曰宣子甲生智伯瑤此二族皆荀
姓

祁奚晉之公族也

氏族譜曰獻公四世孫

食邑於祁

先是有祁舉祁瞞

景公

十七年益以趙氏之田及趙武立田復趙氏悼公初年奚爲中軍尉羊舌職佐之三年奚請老公問嗣焉稱解狐其讐也將立之而卒又問焉對曰午也可於是羊舌職死矣公問曰孰可以代之對曰赤也可遂使祁午爲中軍尉羊舌赤佐之君子謂祁奚於是能舉善矣稱其讐不爲諂立其子不爲比舉其偏不爲黨平公元年奚爲公族大夫七年范匄逐欒盈殺羊舌虎囚羊舌肸樂王鮒欲爲肸請肸弗應曰必祁大夫室老曰樂王鮒言於君無不行求赦吾子吾子不許祁大夫所不能也而曰必由之何也肸曰樂王鮒從君者也何能行祁大夫外舉不棄讐內舉不失親其獨遺我乎詩曰有覺德行

四國順之夫子覺者也奚時已老居邠聞之乘驛而見
范宣子曰夫謀而鮮過惠訓不倦者叔向有焉社稷之
固也猶將十世宥之以勸能者今壹不免其身以棄社
稷不亦感乎鯀殛而禹興伊尹放太甲而相之卒無怨
色管蔡爲戮周公右王若之何其以虎也棄社稷子爲
善誰敢不勉多殺何爲宣子悅與之乘以言諸公而免
之不見叔向而歸

趙武盾之孫朔之子也朔將下軍而卒景公十七年晉殺
趙同趙括武從母莊姬畜於公宮十九年公夢大厲而
薨其後乃立武悼公元年武始爲卿平公十年代范匄
爲政令薄諸侯之幣而重其禮十二年歸諸侯侵地會
諸大夫於宋合晉楚之成而弭諸侯之兵稱曰弭蓋十

七年尋盟於虢楚人將執魯叔孫豹武勸之逃對曰豹也受命於君以從諸侯之盟爲社稷也若魯有臯而受盟者逃魯必不免是吾出而危之也若爲諸侯戮者魯誅盡矣必不加師請爲戮也趙孟以爲忠固請於楚而免之過周天王使劉定公勞趙孟於潁冬卒諡曰獻文子文子爲政八年再合諸侯三合大夫服齊狄平秦亂國家不罷民無謗讟諸侯無怨其爲人退然如不勝衣其言訥訥然如不出諸口所舉於晉國筦庫之士七十有餘家生不交利死不屬其子有衰之風焉子成爲中軍佐卒諡曰景子生鞅

按左傳魯成公八年晉景公之十七年殺趙同趙括武從姬氏畜於公官所謂立武反其田者此左氏要

終之言非此歲事也後二年景公夢大厲人以爲趙氏之祟遂以疾卒若先已立武鬼不應爲祟矣或韓厥因此勸立趙氏武之立當在景公之未厲公之初自景公十七年至平公十七年武卒之歲爲魯昭公元年通四十三年耳武與劉定公言自稱曰老夫此古者大夫七十之禮定公亦譏武爲老將至而耄及之則殺同括之年武決非提抱之兒史記以殺趙朔及同括爲景公三年事而反以春秋殺同括之年爲立武之年此誤解左氏傳文而顯與春秋相背夫景公三年趙朔方將下軍爲邲之戰其後趙同獻翟俘盟鄭伯事不一書無論屠岸專殺理所必無而年事錯謬爲尤甚斷之以春秋則程嬰公孫之徒皆子虛

無徵矣

祁午奚之子奚辭於軍尉悼公問孰可以伐之對曰臣之子午可人有言曰擇臣莫若君擇子莫若父午之少也婉以從令游有鄉處有所好學而不戲其壯也彊志而用命守業而不淫有直質而無流心非義不變非上不舉若臨大事其可以賢於臣也乃使午爲軍尉歷平公之世軍無秕政楚遠啟疆稱晉大夫叔向之下次卽祁午午子盈以專殺其家臣晉滅祁氏分其田爲七縣公室遂衰

荀吳偃之子平公十七年吳帥師敗無終及羣翟於太原將戰遇阨去車以爲步卒其嬖人不肯卽卒斬以徇爲五陳以相離而誘之翟人笑之未陳而薄之次敗之五

年吳帥師伐鮮虞圍鼓鼓人或請以城叛弗受軍吏曰
無勞師而得城何故不爲吳曰或以吾城叛吾所甚惡
也人以城來吾獨何賞焉若其不賞是失信也何以鹿
民吾不可以欲城而邇姦使鼓人殺叛人而繕守備圍
鼓三月鼓人或請降使其民見曰猶有食色姑修而城
軍吏曰獲城而弗取勤民而頓兵何以事君吳曰吾以
事君也獲一邑而教民怠將焉用邑鼓人能事其君我
亦能事吾君城可獲而民知義所有死命而無二心不
亦可乎鼓人告食竭力盡而後取之克鼓而反不戮一
人以鼓子鳶鞮歸旣獻而反鼓子焉頃公元年吳帥師
滅陸渾之戎使人請於周祭雒與三塗陸渾人弗知師
從之韓起夢文公攜荀吳而授之陸渾師還獻俘於文

宮五年鼓人又叛於鮮虞六年荀吳畧東陽襲鼓滅之
復以鳶鞮歸使涉陀守之令鼓人各復其所鼓子之臣
夙沙釐以其孥行軍吏執之辭曰我君是事非事土也
今君實遷臣何賴於鼓吳謂之曰鼓有君矣爾止事君
對曰臣委質於翟之鼓未委質於晉之鼓委質而策死
古之法也臣無畔質敢卽私利吳顧左右而歎曰吾何
德之務而有此臣也乃使行言於頃公與鼓子以河陰
之田使夙沙釐相之昭公元年楚滅蔡吳言於韓起會
於厥憇謀救蔡不克二年齊侯朝於晉吳相君以齊侯
宴秋吳僞會齊師者假道於鮮虞遂入昔陽滅肥以肥
子縣皐歸冬遂伐鮮虞三年吳以上軍侵鮮虞以其不
修備也大獲而歸平邱之會晉以邾莒之愬執魯大夫

季孫意如吳謂韓起曰楚滅陳蔡不能救而爲夷執親將焉用之乃歸季孫吳卒諡曰穆子其子寅奔齊

趙鞅字志父頃公九年鞅合諸侯戍周備王子朝之難也其明年納敬王於成周定公十五年鞅殺其邯鄲大夫趙午午子稷以邯鄲叛晉圍邯鄲荀寅范吉射黨於午謀攻趙氏董安子閭之告鞅曰先備諸曰晉國有命始禍者死爲後可也七月范氏中行氏伐趙氏之宮鞅奔晉陽晉人圍之荀躒言於晉侯曰君命大臣始旤者死今三臣始禍而獨逐鞅刑不鈞矣請皆逐之十一月公伐范氏中行氏弗克二子伐公敗從而伐之二子奔朝歌韓魏以趙氏爲請十二月趙鞅入絳盟於公宮十八年鞅圍范中行於朝歌二子奔邯鄲十九年齊人輪范

氏粟鄭罕達駟宏送之鞅禦諸鐵大敗鄭師獲齊粟千車二十一年拔邯鄲荀寅奔栢人鞅圍栢人二子奔齊三十年鞅從公會吳於黃池出公十七年卒諡曰簡子簡子襄子皆嘗爲晉政亦稱趙孟

趙母卹簡子孽子也其母翟婢簡子使姑布子卿徧相諸子子卿曰無爲將軍者簡子曰趙氏其滅乎子卿曰吾嘗見一子於路殆君之子也使召母卹至子卿起曰此真將軍矣簡子與諸子語母卹最賢乃告諸子曰吾藏寶符於常山上先得者賞諸子馳求之無所得母卹還曰已得符矣簡子曰奏之母卹曰從常山上臨代代可取也簡子於是知母卹果賢乃廢太子伯魯而立母卹是爲襄子襄子立元年越圍吳襄子降喪食使楚隆問